

# 3 Son

## Pas ngimi Son ai sürü papımarandi

---

<sup>1</sup>Ro anihondümbö-rihindeimbi hifandiri-handeimb-anahi, wandı wandafi Gaius, sihambo pas nda sürü paparihendi. Sihambo anihondümbö ngusüfo parariheanini. <sup>2</sup>O wandafi, sihambohündambo Godimbo didibafayahi. Sihafi ngusüfo didiboado-rihoeimb-ani, nga sihafi ranani moatükuni ra yahurai didiboado-ndihoayowa se aboedi mbimarifa sahehea ranahambo Godimbo hoafiyahühi didibafayahi. <sup>3</sup>Wandafi mami, horombo bidifiri ai wambo sowahi tüküyafu hoafiyomondühi yahomoya, 'Hapoana Gaius ai anihondü hohoanimo süngure arandi horombo rasüngumareandi nou,' mehomo-ndamboyahi ranahambo afindi hihifi-hihifimayahi. <sup>4</sup>Wandı nimori ai anihondü hohoanimo süngurihi arihündi rani hoafi ra himborayahi ana, ro afindi safi hihifi-hihifiya arihandi.

### Gaius ai aboedi didiboadorihoei ratüpuriyu arandi

<sup>5</sup>O wandafi, se wandafi mamimbo didiboadoro farihawandüri arandi. İnga asu se wandafi mami ndifoambo amboa farihawapuri arandi. <sup>6</sup>Nindou rotumbo tüküyahi-rihündeimbi-yafe himboahü hoafiyomondühi yahomoya, 'Gaius ai yihoefimbo ngusüfo pareamunühi mafarihemuni,' mehomo. Se ahamumbo nafi nginambo wari nginirowapuri arandi God ai refi arandi nou. Se rawarowandı ana, aboed-ane. <sup>7</sup>Ai Sisasiombohünda hoangomo arundi, nga nindou ai anihondümböfo-koateyeimbi aheimayo nini-moatükuni moai sowandümo. <sup>8</sup>Nindou yahurai sihiri fehefepurimboane asu rananimbo sihiri ai-babidi Godindi anihondü hoafi fandihehuri-mboyefi.

### Diotrefes ai hohoanimo moaruwai süngumareandi

<sup>9</sup>Horombo ro Kraisindi nendi ranaheimbo pas sürü parihe koamariheheandi. İnga Diotrefes ai ahei bogorimbondahe nimboambo

yahuhaya yihoefi hoafi moai himboriyu. <sup>10</sup>Ranimoane asu ro didi tükündaheandühi ahandi ratüpuri ranahambo hoafinda-handomboyahi. Ai yihoefimbo-hündambo moaruwai hoafi wataporiyu wakire arandi. Rani ratüpuri yangiriyopoani, nga ai sapo wandafi mamimbo himbokaboako-marapuri. Nga nindou ai nindou ranahambo worinifimbo hohoanimondeiani, Diotrefes ai aheimbo yowani yahu arandi, nga ngiri ro-babidi rotundimo yahupuri arandi.

#### **Demitrius ai hohoanimo aboedi süngure arandi**

<sup>11</sup>O wandafi, se ngiri hohoanimo moaruwai süngundowandi. Nga hohoanimo aboedi süngundowandi. Nindou ai aboedi hohoanimo süngundeandani ana, ai Godindi nimor-ani. Nga nindou ai hohoanimo moaruwai süngundeandani ana, ai Godimbo hoeifekoate-ani. <sup>12</sup>Mungu ai Demitriusimbo aboed-ani ase. Nga ra anihond-ane mungu ai fifirihindi. Ro-amboa ahambo anihondumbo hoafiyahühi aboed-ani asahi, nga wandi hoafi anihond-ane ra se fifirowandi.

#### **Bidifirana hoafi**

<sup>13</sup>Sihambo ro afindi hoafi hoafimbo samboanahi, nga pepafihü sürü pefembo moeisahi. <sup>14</sup>Awi hibadandiri, nga se-dibo wataporimbohünda sihambo sowana sinimbo samboanahi. <sup>15</sup>Se ngusüfoambe afundo kundo hawa nimbafi. Wandafi mami ai sihambo hihifarihünini. Yihoefi wandafi mamimbo mamamindandürühi hihifindandüri.